

墓

志

重修筭橋祖墓總碑記

始祖遐公。晉官安成太守。奠基筭橋。傳十世。隋尚書郎延公。徙邑西龍雲下村。隋忠義郎迺公。徙筭橋附近石屋岡。是子姓蕃衍。累代名賢。炳耀吏乘。惟自滄桑屢易。先塋就迫。湏念本源。愴焉涕下。此我贛湘族衆。所由於編纂世牒之日。而汲汲焉以重修兆域爲先務也。謹按筭橋興祚古廟。前後左右。歷葬二世祖啓公。祖妣顏氏。三世祖岱公。嵩公。四世祖芾公。祖妣蔣氏。五世祖喬公。祖妣祝氏。六世祖彥公。七世祖德傑公。十世祖迺公。祖妣王氏。又劉家巷九世祖秦公。十七世祖遜公。合十四塚。分葬五處。茲復各築墳園。重立墓碑。以垂久遠。昔柳下惠墓。樵採有禁。崇拜古賢。聿隆典禮。吾先人福蔭遠垂。鄉人其託。則此後松楸之保守。匪惟梓桑敬止。抑亦守斯土者。遙感棠蔭之留遺。而同申勿剪勿伐之禁也。爲子孫者。惟合忱馨香。以禱祝焉。謹記。

民國二十六年农历丁丑年春月駐湘劉遐公裔修譜事務所重建

醴陵清安舖派五十二世裔建緒

敬立